

東  
華  
續  
錄

東華續錄

道光十

臣王先謙敬編

臣周綱蕃恭校

秋七月丁卯諭國家祀典自有常經邪說誣民本干例禁蘇州府城西楞伽山土人立五通祠前於康熙年間毀祠陪像日久禁弛養饗如故女巫假託神語按簿違願陋習相沿不獨蘇州一府爲然不可不嚴行飭禁著孫玉庭韓文綺卽將境內五通等淫祠撤毀其女巫等隨時訪拏嚴加懲治以維風俗而正人心○壬申撥福建閩安營都司千總各一駐閩縣琅琦島○癸酉調裕恩爲吏部左侍郎明志爲戶部左侍郎奎照爲禮部右侍郎以百春署吏部右侍郎由副都統署○丙子韓封因案解任調陳若霖爲刑部尙書以陸以莊爲工部尙書姚文田爲左都御史調周系英爲戶部左

侍郎程含章爲工部左侍郎以辛從益署吏部右侍郎

由禮部侍郎兼署

○己卯大學士托津等奏訊明解任侍郎恩銘等請交部嚴議得旨此案解任侍郎恩銘常英與董椿銀錢借貸往還經托津等訊明覆奏皆由董椿借名影射惟該侍郎等以二品大員不知自愛乃與市井匪人往來交結以致董椿向其屬託公事又不卽時舉發均屬有玷官箴至常英於董椿事發投案之前至伊家內該侍郎不立卽奏明送案意存徇隱咎無可辭恩銘常英俱著交部嚴加議處飭令回家聽候部議尙書那清安前在左都御史任內董椿曾以候際清贖罪之事懇其託情當時並不奏請究辦及刑部訊出此案書吏得贓數均元等請旨回避時該尙書又不據實陳明迨蘇仁壽到案供出諭令明白回奏始據奏稱董椿曾向託情雖未允許亦有應得之咎那清安著交部議處尋革恩銘常英職

那清安降四級留任○命禮部增定通禮服制○辛巳大學士戴  
均元以年老乞休允之賞食全俸○壬午調敬徵爲戶部右侍郎  
以廣泰爲工部右侍郎由內務府大臣選○轉耆英爲兵部左侍郎調凱  
音布爲兵部右侍郎以那丹珠爲理藩院右侍郎由左副都御史選○甲  
申大學士托津等奏原任刑部尙書韓封親供與盛思道董椿原  
供全不相符大員未便質證恐其堅不吐實請暫行革職以便提  
同質對得旨尙書韓封著暫行革職交托津等卽提同盛思道董  
椿三面質對○庚寅裁貴州貞豐州土外委○是月貸湖北衛昌  
德安二營兵丁倉穀緩徵山東日照縣霍災新舊額賦

閏七月甲午諭侯際清以擬流官犯在刑部衙門呈請贖罪尙書  
韓封在部最久於刑名尤爲諳練乃辦理奏臬時旣覈其情節較  
重仍以可否准贖雙請殊屬取巧含混見據托津等訊明韓封實

無聽屬受賄情事惟失察官吏舞弊得贓及嗣子知情親戚撞騙  
且案內獲咎司員恩德等皆係保列一等之人盛思道又係韓對  
於上年濫行保留種種昏愎卽照托津等所擬從重發往軍臺本  
屬咎所應得姑念韓對年近七十著從寬免其發遣加恩在萬年  
吉地工程處效力贖罪已革刑部郎中恩德與董椿等商辦贖罪  
收受不枉法贓一百二十兩以上若僅照例問擬絞候勒限完贓  
減等發落尙屬輕縱著於完贓後從重發往伊犁效力贖罪已革  
郎中盛思道爲候際清商辦贖罪先後撞騙多贓到案後復任意  
狡展誣賴情殊險詐可惡著從重發往伊犁效力贖罪已革通判  
董椿指官撞騙銀兩數至盈千到案後復不據實供吐狡賴誣扳  
情尤誦詐著枷號兩箇月滿日發近邊充軍已革道員惠豐訊無  
屬託重情惟謊言回復惠林究有不合著開復原官交吏部照例

議處其漏查紅供失察官吏得贓之刑部堂官前任科布多參贊大臣那彥寶及兩次畫臺之盛京刑部侍郎海齡江蘇巡撫韓文綺候補主事張映漢俱著交部嚴加議處致仕大學士戴均元陝甘總督那彥成於八月內雙請奏稟未能查出弊端亦屬疏漏俱著交部議處原任道員德恩左江道重倫河北道鄒錫澐於吳光斗等藏匿紅供未經查出並失察書吏舞弊及同官得贓俱著交部嚴加議處嗣後刑部辦理贖罪案件著仍照乾隆四十八年原議章程分別准贖不准贖二項奏明請旨覈定不得以可否字樣雙請入奏以免歧誤○正黃旗漢軍都統三等承恩公孟佳卒賞銀五百兩治喪命皇長子奕緯賜奠賜祭葬諡敬慎○乙未諭京察爲三年考績大典用以整飭吏治激揚人才各衙門堂官果能黜華崇實推賢選能自可爲朝廷收得人之效若如近日侯際清

贖罪舞弊一案牽涉官吏實出情理之外恩德盛思道均係刑部  
司官輒與市井棍徒朋謀撞騙該堂官既不能即時查辦猶復將  
恩德登諸薦牘其餘定稟各員亦皆保列一等或被供指得贓或  
以聽情徇隱似此名實溷淆是非倒置所謂激敘官方者安在因  
思刑部如是各衙門恐亦不無此弊明年卽屆京察之期各部院  
堂官務當秉公遴拔以備任使若冒濫充數甚至曲徇己私將來  
該員等款蹟敗露惟原保之堂官是問○辛丑諭本日吏部將侯  
際清贖罪案內前任刑部堂司各官分別嚴議議處那彥寶等於  
道光元年五月內具奏時並未查出紅供又於司員書吏得贓毫  
無覺察韓封業經革職在萬年吉地工程處效力贖罪那彥寶等  
同爲堂官率行畫諾厥罪惟均雖韓封有嗣子知情親戚撞騙情  
事然定稟同在一堂若專恃韓封又安用諸侍郎爲耶著照部議

頭等侍衛那彥寶著於職任內降四級用盛京刑部侍郎海齡江蘇巡撫韓文綺著降四級調用候補主事張映漢著於補官日降四級用戴均元等僅盡八月奏彙一次惟未能查出弊端亦屬疏漏致仕大學士戴均元著降頂帶一級陝甘總督那彥成著加恩改爲降二級留任其失察書吏舞弊之原任直隸口北道德恩著於補官日降三級用廣西左江道重倫河南河北道鄒錫溶俱著降三級調用原任廣東惠潮嘉道惠豐並未聽從屬託咎止謊言回覆著降一級留任均不准其抵銷○調多福爲盛京刑部侍郎凱音布爲刑部右侍郎以寶興爲兵部右侍郎曲左副都御史遷○調張師誠爲江蘇巡撫以朱桂楨爲山西巡撫費丙章爲山東布政使賀長齡爲廣西按察使曲山東兗沂曹濟道遷○壬寅諭直省道府廳州縣人員平日立品居心官聲輿論該督撫見聞所及隨時察看自必



知之最悉著各於所屬道府廳州縣中有實在潔己愛民誠心辦公眾口交稱者由該督撫出具切實考語秉公具摺保奏數員候朕簡用該督撫務當各矢公忠據實保舉勿許稍有瞻徇冒濫用副朕求賢佐治之至意○添設江蘇吳淞營把總一外委二移嘉定寶山兩縣交界外委協防嘉定汛○甲辰予故明殉難安徽貴池縣副將馬應奎汪思誠參將程宗熹守備曹大鎬入祀忠義祠○丙午予告大學士戴均元回籍賜 御書 御製詩章並命沿途地方官在二十里內者護行○丁未命孫玉庭爲體仁閣大學士以蔣攸銑協辦大學士均留總督任○成都將軍呢瑪善卒贈太子少保銜賞銀一千兩治喪賜祭葬諡勤襄○戊申以德奎爲左副都御史伊里布爲湖北布政使富呢揚阿爲浙江按察使黜遷使○庚戌命翰林院編纂嘉慶十八年逆匪滋事案內殉節入

祀昭忠祠各員列傳○辛亥朱桂楨丁憂以福縣爲山西巡撫屠

之申爲直隸布政使

由清河道遷

○癸丑前任成都將軍呢瑪善奏成

都止設副都統一員比他省尤關緊要見任副都統蘇冲阿係前

任西安將軍德楞泰之子未歷外任不諳軍務請另行簡用成都

止用外省駐防一員足可勝任緣駐防儉約者多奢華者少非實

有軍功不能升二三品大員較之京城侯伯世家似屬曉事得旨

足見謀國忠誠不覺倍加悼惜也○乙卯調昇寅爲刑部侍郎以

善慶爲盛京禮部侍郎

由副都統遷

○免安徽無爲等三十一州縣衛

上年水災旱災額賦○丁巳諭軍機大臣等前據程含章奏江西

各縣缺分苦樂不均請於缺分較優之廬陵等三十二縣每年分

別酌提羨餘銀兩津貼大庾等十廳縣以資辦公疊經降旨交毓

岱詳查妥議茲據奏稱按之見在情形尙無窒礙事屬可行惟將

來或應變通或應停止隨時察看斟酌辦理等語州縣缺分繁簡不同情形亦隨時互異若就目前賠累之缺爲權宜補救之方將來又復疊議紛更轉生枝節且地方官應得養廉之外皆係陋規本非令典今爲較量肥瘠挹彼注茲一或辦理不善則地方皆得藉口賠累必致朘削民膏肆無忌憚是徒飽貪汚之私囊於吏治民生兩無裨益所有程含章奏請津貼之處著不准行該撫惟當秉公率屬獎廉斥貪則吏治自可肅清不在瑣屑調劑徒滋流弊也○戊午改建浙江防海魚鱗石塘並築復隨塘坦水○是月貸江南奇兵等二營銀米

八月壬戌命江蘇按察使林則徐籌濬江浙水道○大學士兩江總督孫玉庭等奏會商綜辦江浙水利大員惟江蘇臬司林則徐器識遠大處事精詳曾任杭嘉湖道及淮海道浙西地方均爲熟

悉水利亦夙所究心實堪勝任批卽朕特派非伊而誰所請甚是

○以常文爲左副都御史鄂山爲陝西布政使阿勒清阿爲河南

按察使由直隸口○甲子刑部等衙門議覆陝西巡撫盧坤題民

人趙蓮汝強姦伊媳李氏被李氏用刀拒傷依律擬斬立決聲明

請旨得旨李氏猝被伊翁強姦情急拒傷與無故干犯尊長者迥

別著免其治罪卽行釋放○己巳 御試翰林詹事等官擢朱方

增等五員爲一等餘升黜留館有差○庚午續纂通禮成 御製

序文○甲戌諭王府官員有過犯應行參革者五品以上交兵部

專案具題六品以下咨部彙題著爲令○戊寅 上御經筵○庚

辰程國仁丁憂以蘇明阿爲貴州巡撫調蘇成額爲廣東布政使

以錢寶甫爲山西布政使鄧廷楨爲陝西按察使由直隸通○林

則徐丁憂以葉紹本爲江蘇按察使由兩淮鹽運使遷○丙戌予告大學

士伯麟卒晉太子太保命 皇長子奕緯賜奠賞銀五百兩治喪  
賜祭葬諡文愼○丁亥毓岱以疾免以成格爲江西巡撫轉凱音  
布爲刑部左侍郎以常文署刑部右侍郎由左副都御史署○是月展緩  
河南儀封等十三廳縣水災新舊額賦蠲緩長蘆興國等七場滄  
州等七州縣上年水災竈課甘肅宜禾縣旱災額賦

九月甲午飭修直隸千里長隄○乙未翰林院奏請將嘉慶十四  
年以後出洋淹斃官兵雲南四川陝甘陣亡弁兵一體立傳允之  
○丙申調葉紹本爲廣西按察使賀長齡爲江蘇按察使○己亥  
諭軍機大臣等慶祥奏領隊赴哈薩克游牧封汗賜奠行抵巴彥烏拉地  
伊犁領隊大臣樂善赴哈薩克游牧封汗賜奠行抵巴彥烏拉地  
方愛畢勒達前來迎接離巴彥烏拉七十里被俄羅斯勒索租賦  
將愛畢勒達截去外夷交易起釁本屬常有疆外之事原可不須

過問天朝亦斷無派員再往之理俟其前來請領敕書再行發給  
至該將軍奏請飭理藩院轉諭薩納特衙門詢問俄羅斯之處竟  
可不必惟應嚴飭沿邊卡倫謹守邊界如有哈薩克投誠內附者  
妥速辦理毋許私人開齊以安邊徼其樂善另捐自請議處之處  
著加恩寬免○壬寅帥承瀛丁憂以黃鳴傑署浙江巡撫調伊里  
布爲浙江布政使費丙章爲湖北布政使以訥爾經額署山東布  
政使起韓文綺爲山東按察使降調○調王維詢爲浙江按察使  
富呢揚阿爲湖北按察使○癸卯免安徽無爲等十一州縣上年  
被災學田租銀○甲辰賞理藩院尙書穆彰阿之父已革右翼總  
兵廣泰二品職銜○壬子添設江南河營蕭下等五汛外委各一  
○甲寅諭軍機大臣等永芹等奏聞報逆裔前來滋事密派將弁  
防捕一摺逆裔張格爾由霍罕糾約布魯特多人欲來喀什噶爾

滋事該大臣等陸續派員偵探明確隨派官兵同阿奇木邁瑪薩  
依特派之伯克護衛回兵出卡堵截永芹在城調度一切事宜  
巴彥巴圖復帶領官兵前往英吉沙爾與領隊大臣色布徵額定  
議防守卽馳赴烏魯克等卡倫設法擒拏該大臣等布置悉爲妥  
協張格爾豺野性成膽敢仗和卓名色搖惑回眾殊屬可惡著永  
芹等督飭將弁於各卡倫嚴密防範將該逆犯張格爾及伊弟巴  
布頂迅速追捕務獲永絕根株方爲萬全若該逆犯等行蹤靡定  
亦不可遠帶兵役出卡窮追總在該大臣等相機妥辦實力防守  
勿涉張皇以靖邊圉○丙辰諭前據阿爾邦阿奏長蘆商力日疲  
請照嘉慶十四年成案鹽斤加價二文津貼商人清完積欠經部  
議交蔣攸銑程祖洛會查情形具奏嗣據蔣攸銑等奏請酌加一  
文復經部議俟本年秋成後再行察看具奏彼時朕卽以鹽斤加

價究非朝廷善政所以屢交部議不肯輒允所請旋據御史蔡學川奏請停止長蘆鹽斤加價縷陳四條所奏甚是茲據蔣攸銘等奏秋成後察看引地情形仍請酌增鹽價自因收成豐稔糧價平減商力疲乏積欠滋多爲調劑蘆商起見朕思直隸節年被災今歲雖獲豐收而民困未蘇豈可再議加徵且據蔡學川所奏溯查嘉慶十四年以南河要工加價今長蘆捐辦衛河袁村等處工需非南河大工可比若加價取償是使民代商捐亦屬不成事體蘆商積欠至九百九十餘萬之多屢次加價以抵完積欠爲詞及奏銷之期正課頻年請緩於帑項仍屬無益況加價之後官鹽愈貴私鹽充斥必致官引愈滯商人愈困是恤商而轉以累商也所有蔣攸銘等會議酌增鹽價之處著無庸議○裁貴州冊亨州同屬江邊亭土外委下分亭土把總○是月給陝西甯羌等四州縣災



民口糧貸江蘇瓜州營被災兵丁銀米陝西安定等縣水災雹災倉穀緩徵直隸隆平等九縣山東恩縣水災新舊額賦倉穀展緩山東濟甯等八州縣陝西沔縣等二縣災歉地畝錢糧廣東省河疲商課餉

冬十月乙丑諭軍機大臣等永芹等奏守卡官兵輕敵致有傷亡暨將弁即時擊賊紛竄卡外分路追勦情形一摺張格爾自阿賴地方膽敢糾合二百餘人到烏魯克卡倫焚搶滋擾官兵傷亡三十餘人之多經遊擊劉發恒排隊放槍連斃數賊餘賊紛竄卡外見經巴彥巴圖派人追探賊蹤將卡倫趕緊整頓帶兵出卡色布徵額亦帶兵追賊出卡張格爾一見官兵卽行遁逃諒不出喀拉他什山左近永芹等前派由伊爾古楚卡倫出去截堵之官兵當已到齊趁此雪未封山卽著巴彥巴圖等上緊追擒兩路合圍自

可得手如能擊獲張格爾及伊弟巴布頂明正典刑永絕根株實  
爲妥善如該逆杳無蹤迹亦不必帶兵深入全在該大臣等相機  
妥辦以靖邊圉朕亦不爲遙制此次守卡官兵禦賊被戕殊堪憫  
惻永芹等所奏侍衛一員是否卽係花山布外委賈貴格圖被傷  
見在是否存亡查明具奏其陣亡滿洲兵十三名漢兵八名通事  
回子七名著該大臣等各部照陣亡例賜卹至接運口糧安汛傳  
報等事著酌量道路派官兵協同回子於緊要處所安置務令聲  
氣聯絡所奏自伊爾古楚迤南至烏魯克卡倫每卡添兵四五十  
名俱著照所請行其阿奇木伯克郡王邁瑪薩依特專派部落並  
伯克等帶領布魯特回兵在伊爾古楚卡外協力堵截豫備接濟  
烏拉馬匹勇往急公深知大義可嘉之至著永芹等查明該郡王  
出力之處俟事定之後據實具奏再降諭旨至色布徵額見經出

卡追賊英吉沙爾地方緊要卽著章京全福協同遊擊周悅勝小心防守並辦理接運口糧其餘各卡倫務飭官弁加意防範毋得稍涉懈怠致有疏虞○辛未諭軍機大臣等前據魏元煜奏立冬後黃水未消糧船守候情形降旨令孫玉庭等會籌減黃蓄清俾糧船及早歸次續據孫玉庭張文浩奏到見在籌啓減黃開座以便開放禦黃壩趲渡回空糧船迄今又逾旬餘未據續奏黃水消落情形並幫船會否渡黃朕心實深廕念本年黃水來源雖較上年稍旺然當此水落之候何至黃水高於清水一尺三寸之多孫玉庭係兼轄河務大員張文浩身任河督黃運兩河是其專責豈不知所關甚鉅務各激發天良迅速將清水設法擎托俾回空軍船足資浮送儻欲守待黃水自行消落全無把握自失機宜貽誤新漕咎將誰諉朕惟該督等是問且糧船守候水次計一千七百

八十隻此時卽上緊催趲全數渡竣已不爲早况風高物燥火燭甚爲可慮旗丁坐食需時一切費用保無支絀水手人眾龐雜管束匪易勿令滋生事端一俟河道通暢卽嚴飭河標弁兵督同漕弁等將回空糧船趕緊催挽無分晝夜過一幫卽少阻一幫早一日卽少費一日該督等接奉此旨卽將見在啓閘開壩黃水是否消落清水是否暢注糧船是否行走無阻各情形由驛奏聞以慰廑注○乙亥諭軍機大臣等本日孫玉庭等會奏濟送回空幫船情形已另有旨諭令該督等相機辦理矣本年黃水來源雖旺然節交冬令至今已屆月餘何以竟未消落張文浩身任河督於修防諸務理應先事豫籌妥爲勘辦乃漫不經心任令清水微弱勢不敢黃以致漕船阻滯多幫不能挽渡從前黎世序綜理南河歷年以來汎水安瀾往來利涉並未有重空船隻阻水停待之事張

文浩甫經接任於一切河務如果循照舊章何至遽有貽誤朕聞  
禦黃壩堵遲該河督妄意更改不合機宜辦理錯誤致有此失豈  
不大負委任孫玉庭接奉此旨著確加查訪將該河督本年籌辦  
情形及如何堵遲貽誤之處據實具奏毋得稍有掩飾自干重咎  
○丙子諭軍機大臣等永芹等奏官兵勦賊連獲助逆賊目多名  
審明懲辦並酌量撤兵一摺張格爾糾合賊匪到烏魯克卡倫焚  
搶旋竄卡外經巴彥巴圖魯布徵額帶兵追勦斬獲搶卡布魯特  
賊匪二十餘名並擊獲賊目伊斯拉木經永芹督率郡王邁瑪薩  
依特訊出張格爾燒卡與官兵對敵不住率同四五十人盡命奔  
逃見探明張格爾僅帶二十六人困乏已極奔投喀拉提錦部落  
苟延殘喘其近卡喀拉提依特部落助逆頭人那爾巴他並其弟  
西爾就獲交出官兵烏槍五桿及侍衛花山布所戴花翎又擒獲

爲張格爾執旗之頭人阿玉巴什供出巴哈提拜尖胡里圖爾底等經永芹於訊明後將六犯斬梟其雅曼提依特部落頭人西爾噶孜卽係孜牙墩作亂助逆之犯業已傷死並殲斃賊匪四十餘名甚爲妥善至伊斯拉木一犯係奈曼部落布嚕特比五品頂翎愛薩胞弟其愆憑張格爾滋事罪不容誅惟竟予正法其兄愛薩必生疑懼著暫交邁瑪薩依特小心看守並諭伊兄愛薩以後如果出力擒拏逆裔卽可免伊弟一死如此剴切曉諭或畏罪不敢助逆張格爾無所糾約必將自斃如敢仍前覬覦卽著該大臣等隨機擒拏務淨逆孽其隨聲附和之賊自不必重勞兵力曠日持久著派可靠之布嚕特比拜尼雜爾查拏解該大臣懲辦巴彥巴圖等著卽撤兵於可防各卡倫增兵嚴守巡緝加意防範毋稍疏虞所有前次陣亡之侍衛花山布等並此次擒賊接仗陣亡漢兵

一名索倫兵一名著該大臣一併咨部照例分別賞卹其隨同出力之布魯特比等各帶所屬布魯特於差探不辭勞瘁著准其援照成案每小布魯特一名賞銀二兩每回子兵一名除自備口糧馬匹外酌賞鹽菜銀九錢其滿漢官兵隨營所給口糧准其報銷在事出力之布魯特比回子伯克等著永芹會同巴彥巴圖魯布徵額詳覈具奏再降諭旨又另片奏派出伊爾古楚卡倫外迎堵逆裔歸路官兵未能截擊應行究問所奏甚是著俟撤兵回城該大臣查問明確據實具奏○丁丑准山西絳州等二十六州縣丁銀攤入地糧○甲申諭軍機大臣等孫玉庭等奏趕辦啓放王營減壩情形一摺據稱洪湖水勢見蓄至一丈七尺以外無可再蓄啓放祥符五瑞二閘黃水未能速減初七日以後或消或長十六十七兩日清水較高十八日黃水復長七寸萬分焦灼惟趕辦王

營減壩等語前因軍船久阻河北所關甚鉅屢經降旨令該督等會同設法籌辦見已盼望旬餘本日該督等奏到朕以爲自係軍船可以趲渡及閱所奏情形仍無一幫渡黃該督等所司何事竟毫無把握遲誤至此本年漕船歸次必須冬兌冬開方可不誤來年新運朕心實爲廬念此時宜如何設法趕辦朕亦不爲遙制既據該督等請開王營減壩著卽迅速相機妥爲辦理務令克期啓放禦黃壩督趲漕船銜尾前進不許稍有脫幫果能悉數渡黃晝夜兼行以速補遲不致貽誤尙可稍贖前愆萬一坐失機宜見屆冬至期近轉瞬河冰凍結孫玉庭係兼轄之員張文浩專管河務責無旁貸自問能當此重咎否耶該督等一俟清水暢注糧船順行卽著由驛速奏以慰廬注○予告大學士章煦卒予祭葬諡文簡○丙戌命福建臺灣道兼管臺營水陸官兵○是月展緩湖北



沔陽等十五州縣並屯坐各衛水災旱災新舊額賦緩徵江蘇高郵等二十五州縣衛水災旱災湖南澧州水災額賦兩淮中正等三場水災額課並新舊折價口糧山東濟甯等四州縣衛修隄攤徵銀鹽商引票並舊欠銀黑龍江齊齊哈爾等處旗人上年續借口糧

十一月戊戌諭孫玉庭等奏回空漕船全數渡黃一摺本年回空軍船停待日久節經降旨嚴催茲據該督等將束清禦黃兩壩大加拆展清水暢順於本月初四日軍船全數渡黃辦理尙爲妥協覽奏欣慰見在節逾冬至漕船歸次已不爲早該督等務須節節催趲俾銜尾前進趁此天氣融和並無冰凍晝夜兼行以速補運及早歸次無誤冬兌冬開日期至來年新運北來尤爲緊要河口一帶如有淤淺處所必須及早籌疏著孫玉庭張文浩督率河員

趕緊妥辦務令一律通暢勿致臨時再有阻滯致干重咎○壬寅諭臺灣千總把總外委等官三年期滿無庸調回內地○丁未諭吏部奏議處江南河道總督張文浩等請分別革職降調等語本年回空各幫船在河北停阻至數月之久張文浩綜理南河於一切修防是其專責乃並不隨時查勘豫爲設法妥辦以致延誤漕行所司何事其辦理錯謬之處卽照部議革職實屬罪所應得惟念自前月二十日以後清水暢順幫船陸續開放業已全數趲渡幸未貽誤該河督之罪尙可稍從末減張文浩著拔去花翎降爲三品頂帶仍留河督之任以觀後效該河督務當激發天良董率工員將緊要處所及早趕緊疏挑俾皆通暢備明歲重運經臨復有淤淺阻滯之事必當從重治罪不能再邀寬貸孫玉庭係兼轄河務未能常川駐工督辦咎尙可原第以大學士節制兩江旣知

張文浩辦理不善乃不早爲參奏意存徇隱咎實在此著加恩改爲降三級留任不准抵銷○己酉禮部奏定例節婦三十歲以內守節如未逾五十身故必守節已屆十五年者方准旌表今安徽已故民婦王楊氏守節十三年例不准旌惟節婦貞女情事相同乾隆三十六年題准旌表已故貞女不拘年限應請嗣後已故節婦改照見存節婦二十年例限之半已及十年者旌從之○辛亥諭孫玉庭等奏堰盱大隄壩塌過水見籌堵築一摺本年洪澤湖蓄水過多節經酌啓信智兩壩以資宣洩嗣因連日西北風猛烈異常浪潑隄頂旋即凍結工員等併力搶護人夫均難立足以致高堰十三堡隄頂刷掣成槽塌通過水山盱周橋之息浪菴亦過水八九丈各壩內均有掣通處所見據該督等議將十三堡缺口首先堵築餘卽分投攢辦並啓放通江通海各閘壩以洩漫水此

次石工掣卸雖由風勢猛勁人力難施而該管各官平日漫不經心疏於防範實有應得之咎所有高堰通判繆銘山盱通判孫厚坤高堰守備汪元音山盱守備尹璉俱著摘去頂帶准揚道沈學廉河營參將張兆遊擊黃廷珠俱著交部議處仍令戴罪督修張文浩綜理全河未能豫籌妥協致令要工掣塌過水著交部嚴加議處其壩下附近被水民人有應行撫卹之處著該督查明據實具奏毋使失所至另片奏堵築工需銀兩著准其動借淮關存餉二十萬兩濟用俟歲料餉銀解到卽行歸款務須嚴飭工員撙節估計覈實承辦不得藉端浮冒虛糜致干咎戾○命文孚汪廷珍馳往江南查看高堰漫口○解張文浩任調嚴煥爲江南河道總督賞張井三品頂帶署河東河道總督由河南開歸陳許道署○癸丑裁貴州歸化廳屬洛河枝土把總冊亨州同屬上分亭土千總○甲寅

諭軍機大臣等前據孫玉庭等奏堰圩大隄被風暴掣塌過水見在趕籌堵築特派文孚等前往查勘實在情形朕思此事固由張文浩辦理不善所致然孫玉庭以大學士節制兩江兼轄河務自應及早參奏乃意存徇隱欲爲消弭此時若仍留兩江總督之任文孚等查辦恐多掣肘之處著文孚等到清江日卽傳旨將孫玉庭解任張文浩革職所有兩江總督事務著魏元煜署理文孚等當細心密訪務使功罪分明毋得稍有畸重畸輕之見○諭吉林伯都訥阿勒楚喀等處開墾荒地移居京旗閒散○命兵部尙書玉麟在軍機大臣上行走○乙卯 上詣 大高殿祈雪○諭向來宗室廢生未及歲者俱不戴用四品頂帶與滿漢廢生未能畫一嗣後宗室內如有恩廕人員無論年已未及歲俱著加恩一體戴用四品頂帶○丙辰周系英以病免調李宗昉爲戶部左侍郎

轉辛從益爲禮部左侍郎以汪守和爲禮部右侍郎朱方增爲內閣學士兼禮部侍郎銜候補內閣學士○是月給安徽宿州靈璧縣及屯坐各衛災民口糧貸江甯八旗兩江督標協標兵丁餉銀甘肅靜甯等十三州縣及東樂縣丞所屬災民口糧展緩直隸昌平等六十州縣舊借籽種口糧浙江海甯等十八州縣額賦緩徵宿州等二十七州縣衛水災旱災甘肅狄道等二十一州縣及沙泥州判莊浪東樂二縣丞所屬旱災新舊額賦福建鹽商積欠銀

十二月己未朔

上復詣

大高殿祈雪○孫玉庭奏此次堰肝

湖工掣通過水實由暴風狂猛人力難防張文浩但爲節省啓閉錢糧堵運禦黃壩蓄清過旺轉致棘手請另簡賢能令該河督留工效力贖罪得旨風暴由天蓄清過旺亦由天平若因節省一二萬金起見朕斷不信總由任性自用不守前規不恤人言以致坐

令債事此等剛愎自用誤國溺職之人朕決不能姑息也○辛酉  
命截留江蘇淮安府漕米一萬五千石賑山陽清河二縣水災○  
丙寅諭軍機大臣等本日孫玉庭等奏趨堵高堰十三堡及智禮  
信壩各缺口完竣情形據稱見將高堰十三堡興工進占息浪菴  
缺口跌塘情形亦盤築壩基以次進占併力趨辦山旰智禮信各  
壩檔內缺口並經委員分投堵竣下游高郵邵伯一帶將昭關壩  
兩牆掣塌刷去兩頭土隄過水始暢工程俱搶護平穩等語著交  
孚等逐加履勘嚴督在工員弁將業經堵築處所仍行跟築後戲  
務期穩實其興工進占及尙未堵辦各口門亦卽飭令趕緊辦理  
庶可剋期歲工毋得遲逾草率誤事惟洪湖水勢經此次漫注之  
後消耗在所不免明春重運經臨浮送恐未能得力引黃濟運之  
說實非善策文孚等務當先事籌辦相機啓放總當將清水多爲

收蓄則幫船行走不至稍有淺阻方爲盡善至揚廳昭關壩係上年新修之工所有補築掣塌錢糧著照例在原辦各員名下責令賠繳○戊辰實授魏元煜兩江總督以顏檢爲漕運總督調程含章爲倉場侍郎辛從益爲工部左侍郎轉汪守和爲禮部左侍郎以劉彬士爲禮部右侍郎卹左副都○河南巡撫程祖洛代奏正二品廕生黎學洵謝故父江南河道總督黎世序賜諡等恩得旨回思幹國賢良不覺淚隨筆灑九原下諒知朕心矣○己巳諭孫玉庭等奏通籌三江水利請借項先修各工一摺江浙興辦水利事關兩省水道農田節經降旨飭令通盤籌畫酌分先後以次興工茲據孫玉庭等查明青浦婁縣吳江震澤華亭五屬承太湖下注黃浦各支河淺滯淤阻應挑應切共估需土方並柴壩單長計銀九萬五千八百餘兩又吳淞江爲太湖下注幹河由上海出閘



與黃浦合流入海因去路阻塞流行不暢應於受淤最厚之處大加挑浚共估需土方銀三十萬五千一百餘兩此兩路估需銀兩著准其在捐監撥歸封貯款內照數動給俟工程全竣之日攤徵還款其已廢蕩田如有升科者准予豁賦無庸再給產價並著援照民捐成案免其造冊報銷見屆冬令農隙之時著新任總督魏元煜等卽責成各該地方官各就坐落處所雇夫應役分投趕辦毋許虛糜草率及稍有剋扣勒派情弊至吳淞江口四孔大閘近因上游杭嘉湖等府溪河每多沙壅若再向下游修建閘壩堵禦渾潮必致阻遏上游來水殊於浙省未便其應否修築之處著悉心酌商妥議具奏再另片奏此次工程較大一切應需公費甚繁並無別項可以籌動著准照前乾隆年間奏辦水利之案將河工程銀兩每百兩扣存五兩留貯司庫豫備雜用俾各州縣無可

藉口賠累以昭覈實○改河南歸德府通判駐永城縣薛家湖集  
添設守備外委各一駐永城縣移永城縣千總駐虞城汛  
把總駐永城縣新橋集改永城縣山城集額外外委爲經制外委  
添設歸德營存城額外外委二裁開封府儀封廳通判添設汝甯  
新息分防通判駐黃湖店改蘭陽縣爲蘭儀縣定爲衝繁要缺改  
儀封廳教諭爲儀封鄉學教諭改儀封廳管河經歷爲儀封司管  
河經歷○癸酉諭軍機大臣等本日侍講學士潘錫恩奏陳借黃  
濟運之弊據摺內稱蓄清敵黃爲相傳之成法大汛將至急堵禦  
黃壩使黃水全力東趨今年漕船早渡張文浩將禦黃壩運堵以  
致倒灌停淤釀成大患且欲籌減洩當在下游乃輒開祥符閘減  
黃入湖壩口已灌於下閘口復灌於上黃水俱無出路湖底淤墊  
極高若更引黃入運河道淤滿處處壅溢恐有缺口之患等語本

年南河黃水盛漲幫船阻滯皆因禦黃壩堵遲所致彼時節經孫  
玉庭等奏稱先將禦黃壩上游祥符五瑞二閘啓放宜洩嗣因日  
久消減甚遲方議趕辦王營減壩雖漕船旋即趨渡而洪湖北半  
全爲黃水墊高隄堰石工因之掣塌漫口該學士奏以爲辦理失  
當著文孚等再行詳查張文浩前此議開祥符五瑞二閘是否不  
應啓放並啓放後是否因此黃水直灌全湖如果不應啓放則張  
文浩於禦黃壩堵遲旣已坐失機宜又復不守成規妄行債事其  
咎更重著卽查訪明確據實具奏至引黃濟運殊非善策朕前旨  
甚明文孚等務當悉心妥議計及萬全不可將就了事致滋後患  
○丙子諭軍機大臣等魏元煜奏淮河洪澤湖水勢情形並催重  
運趕緊兌開一摺據稱高堰隄工掣通水勢旁洩南趨湖中所存  
無幾見雖上緊籌堵而冬令來源不旺收蓄無多是藉黃濟運誠

屬不得已之權宜所慮河道今昔不同並黃水長落變遷非如清水能用人力節宣且淮河自清江上下以至平橋一帶亦多閒段淤淺非大加挑濬一律寬深則引黃入運無以爲受淤之地見經估計興挑如果一律寬深趁黃水不甚渾濁之時竭力趲挽尙不至十分掣肘仍不論省分幫次先到瓜洲口者先提北上如黃水入運暢行卽加緊趲催設黃水入運較小亦可相機起剝等語本年高堰壩塌湖水宣洩過多明春重運北上清水浮送不能得力漕糧關繫天庾正供斷不能任其阻滯藉黃濟運本屬下策此數月內能將閘壩趲緊集料次第堵閉收蓄清水來春出口之路譬律深通使重運得以趲行自屬甚妥見據魏元煜奏淮水洪澤湖水勢情形兼籌及清江上下一律挑濬寬深引黃入運不至受淤意在權宜辦理朕亦不爲遙制但河漕全局關繫重大若止顧目

前之計將來運河受病愈深挑濬愈難誰執其咎文孚等接奉此旨卽著會同細心察看通盤計畫籌及萬全務令軍船早日北來而運河亦無後患方爲至善○戊寅移直隸長垣縣縣丞唐縣主簿駐千里長隄改寶坻豐潤玉田獻縣正定元城專河主簿爲兼河缺分管捕務○移四川南部縣富村驛縣丞駐新鎮壩廣元縣朝天鎮巡檢駐富村驛○己卯召明山來京以長齡爲雲貴總督○孫玉庭奏高堰漫口合龍○癸未諭文孚奏遵查堰圩要工潰缺情形一摺甚屬明晰前因洪湖蓄水過多高堰掣塌口門二處並塌卸石工至一萬一千餘丈實爲從來所未有之事經朕特派尙書文孚汪廷珍馳赴該處查辦並將張文浩革職孫玉庭先行解任茲據文孚等逐加履勘詳訊工員僉稱張文浩於禦黃壩應閉不開五壩應開不開措置乖方以致失事張文浩身任河督一

切修防要務理宜倍加詳慎妥協辦理乃於五六月閒黃水漸長  
節經該道廳稟請堵閉禦黃壩及放壩減洩湖水張文浩一味固  
執不肯聽信馴致湖水過高將堰盱廳工沿隄漫決見在修復堵  
築並將來挑濬運道種種糜帑誤漕固不待言而下游高寶一帶  
州縣民田廬舍蕩析離居淹損人口不可計數是其剛愎自用不  
守前規不恤人言誤國殃民之罪實堪髮指張文浩著在工次枷  
號一箇月滿日發往伊犁效力贖罪以爲河員負恩溺職者戒孫  
玉庭節制兩江兼轄河務明知堵壩遲延皆由張文浩辦理失當  
不早嚴參至朕降旨詢問始行具奏有心徇隱回護咎實難辭孫  
玉庭著交部嚴加議處卽行來京聽候部議淮揚道沈學廉等疏  
防該管堰工漫口均有應得之咎惟會將應堵應放情形屢次具  
稟河督俱未照辦尙非由於該員等貽誤淮揚道沈學廉參將張

兆遊擊黃廷珠俱著摘去頂帶同前已摘去頂帶之高堰通判繆  
鎔山盱通判孫厚坤高堰守備汪元音山盱守備尹連等一併飭  
令在工效力責成認真趕辦不准稍有延玩俟工竣後再降諭旨  
○以那清安爲熱河都統明山爲刑部尙書前任雲貴總督○甲申命奉  
天採買粟米二十萬石籌備京通各倉○丙戌諭吏部奏嚴議大  
學士前任兩江總督孫玉庭降級調用因有革留之案請旨革任  
等語孫玉庭自嘉慶年間總督兩江辦理公事俱屬妥協朕親政  
以後特加任用並授爲大學士仍令管理總督事務伊亦感恩圖  
報數年以來整頓地方不遺餘力卽如查拏鹽梟匪犯節次緝獲  
至數百名之多按律奏辦商民均資利益且其操守素好正己飭  
屬殊不愧封疆之寄本年因南河黃水驟漲張文浩將禦黃壩堵  
遲至有高堰漫口之事彼時孫玉庭明知所辦不合機宜乃遷延

時日不卽早爲參奏貽誤要工其咎實無可辭本應照部議革職姑念孫玉庭總督任內事務較繁河工究係兼轄前此參奏遲延皆由誤聽張文浩之言所致伊向來辦理地方一切均屬認真尙不至於罷斥孫玉庭著加恩改爲革職留任八年無過方准開復並著革去太子少保銜用示朕宥過從長權衡至當之意○是月給雲南太和等三縣災民景東廳屬鹽井竈戶一月口糧及修屋費江蘇高郵等五州縣災民並清河縣難民一月口糧○是歲朝鮮琉球來貢○會計天下民數除直隸三河等州縣福建臺灣府未報數除江蘇福建未報外通共大小男婦三萬七千四百六十萬一千一百三十二名口存倉米穀三千二百八十八萬四千四百六十二石六斗九升八合三勺



東華續錄

道光十一年

臣王先謙敬編

臣周嗣壽恭校

道光五年乙酉春正月癸巳命孫玉庭暫留江南會辦漕運事宜

○甲午諭軍機大臣等文孚等奏籌辦南河濟運衛民要工一摺此次堰盱缺口堵合後黃水已高清水一丈三尺餘寸即使春閒稍有積水亦難敵黃濟運漕船關繫天庾正供斷不能任其阻滯若於黃河以北添設撥船接運事亦窒礙難行此時借黃濟運自係權宜辦理惟從前嘉慶年間重運渡竣而王營減壩及棉拐山李家樓先後失事尤不可不先事豫防籌及萬全著照文孚等所議先於禦黃壩外添建壩工三道鉗束黃流俾免漲滿並於禦黃壩內外及束清運口各壩兩岸離面築作緯道以資束水行緯其

緯道內築作土壩數十道以備黃河內進鑲柴偪溜至裏揚兩廳  
長河淤淺之段大加挑挖兩岸隄身酌估幫培豫貯料物隨時築  
壩偪溜刷淤俾漕行不至淺阻其禦黃壩未啓之前先將東清壩  
以內至高堰八堡一帶引河趕爲估挑以便清水漸長導引入運  
禦黃壩將啓之時即將東清壩嚴密堵閉以杜黃水入湖至漕船  
渡江後著無分幫次連舸北上不許脫空河口一帶多備關纜緯  
失以期拉挽迅速分泊船隻以備起剝並著分派文武幹員提催  
照料務於夏至以前黃水尙未渾濁之時全數趲渡堵閉禦黃壩  
其黃河北岸切近運口之王營減壩裏頭及鹽河隄埽等工見已  
鑲築豫備啓放仍著嚴煥逐細履勘再爲鑲埽幫隄俾黃流不至  
壅漲斷不可任其分洩日久以致下壅上潰該督等當慎之又慎  
毋貽後患至湖隄爲淮揚保障所有殘塌各工自應設法趕辦著

卽採辦料物由運河入高寶湖運至堰盱儘塌卸入湖之舊石鉤  
撈修砌限大汛前一律砌高十層若湖水再長卽啓放山盱之二  
壩三河循序減洩俾下游不至被淹其高堰十三堡山盱息浪菴  
兩處壩工內築裏戩外拋碎石仍多備料土隨時加壓並於坐灣  
犯風各石工多積柴稽料垛以備鑲堵防護並著嚴督工員照估  
加砌務期修築堅實灰漿乾老再行設法減黃相機收蓄漸復舊  
規除王營減壩隄埝各工另估外湖隄掣塌新工例應工員賠修  
著卽墊發趕辦仍於各該員弁名下照數追繳還款文孚等卽飭  
該管道將等逐細查勘勿任浮冒其借黃濟運工程浩大仍會同  
遴選公正諳練之員分任監催以期妥速堅實斷不可稍有疏失  
又致殃民糜帑此爲至要又另片奏見估籌濟重運修復湖隄各  
工約需銀三百萬兩藩關各庫見存銀兩懇卽就近動撥下少銀

六十一萬兩如稍可節減另行覈實請撥等語所奏是所有江蘇安徽三藩庫存銀四十六萬兩揚關存銀三萬兩龍江關存銀三萬兩許墅關存銀九萬兩蕪湖關存銀二十萬兩鳳陽關存銀七萬三千兩俱著准其就近動撥至下少銀六十一萬餘兩前據琦善奏東省豫籌協濟於司庫附貯項下提出銀六十二萬兩再將本年報撥銀十八萬兩共湊足八十萬兩以備撥用等語魏元光等如勘估無可節減著卽一面奏聞一面咨明該督撫就近撥用可也○實授戴三錫四川總督○丁酉命浙江修治河道水利○己亥命修復陝西河渠水利○庚子諭軍機大臣等前據侍郎朱士彥條陳高堰各工程當交文孚等逐條確覈茲據奏體察見在情形詳籌妥議朕詳加披閱內如高堰石工爲蓄清敵黃最要關鍵欲蓄清水必須湖隄鞏固惟蓄水過多從前所築土坦坡斷難

抵禦卽著改用碎石俾堰圩石隄永無塌卸之虞刷黃濟運河漕  
可期並治魏元煜等俟堰圩補修土石隄工辦有端緒卽詳細勘  
估具奏至宣洩黃水惟楊莊運口以下之王營減壩減淤最爲得  
力著將該壩以內鹽河隄埽勘估加築以備大汛啓放分洩毋致  
偏注南岸其山圩五壩原以備減洩湖水見在仁義禮三壩地勢  
高亢引河淺窄智信二壩又經擡高壩底洩水不暢一遇淮水異  
漲卽恐盈滿潰隄著於仁義禮各舊壩處所審擇地勢倣照舊規  
添建石滾壩一座以防異漲魏元煜等一俟要工完竣再行勘議  
具奏餘俱著照所議分別辦理文孚等見在查勘河湖要工及籌  
辦重運事宜俱已次第奏明興辦著再體察情形如見無緊要應  
議事件所有一切工程俱交魏元煜嚴煊查照厯奉諭旨妥速趕  
辦文孚等卽來京供職可也○壬寅諭軍機大臣等永芹等奏逆

裔張格爾竄至喀拉提錦近日屢經布嚕特等探報該犯流移不定招集匪類名曰格得勒沙一種潛往喀拉霍爾罕地方距卡倫遠近不過數日之程附近布嚕特等因其嚇詐搖惑生計不安每以風聞報信等語張格爾以逆犯餘孽膽敢勾連黨類妄思滋事自前此勦捕竄匿之後力窮勢蹙尙復在卡倫附近糾約匪眾仍圖覬覦實屬罪不容誅惟該逆見已逃至卡外潛匿無定不值再勞兵力遠出追拏永芹等務當剴切曉諭布嚕特人眾如果能將該逆等悉數擒獻固屬盡善否則飭令各卡倫隨時嚴密防範毋稍疏懈儻該逆等啓不畏死仍來窺伺立即相機擒捕以淨根株切勿坐失機會該大臣等於此事既不可稍涉輕縱尤不得過事張皇總宜鎮靜安輯是爲至要又另摺奏霍罕伯克遣遞信字分別准駁所奏是外夷錢債細故天朝體制原未便代爲查辦至曉

諭帖內因該伯克不敢提及張格爾事亦未宣露此意俱屬妥協  
○辛亥諭三載考績大典攸關諸臣中實能爲國家宣勤自當甄  
敘年老而精力尙健者仍著留任本年京察屆期吏部將京外各  
大員開單具奏朕詳加裁定大學士托津大學士雲貴總督長齡  
奉職多年恪恭乃事大學士曹振鏞吏部尙書文孚戶部尙書黃  
鉞管理部務均臻妥善而承書諭旨獻替勛尤爲出力協辦大  
學士戶部尙書英和管理部旗諸務俱能盡職禮部尙書汪廷珍  
品行端方部務熟習協辦大學士直隸總督蔣攸銑封疆重任克  
盡職守自調任直隸總督以來通省事務日見起色陝甘總督那  
彥成辦理西甯番案甚屬得宜江南河道總督嚴烜前在河東任  
內宣防盡力歲慶安瀾俱著交部議敘署山東巡撫琦善明幹有  
爲任勞任怨前辦馬進忠逆案不動聲色誅捕淨盡功尤卓著著

加恩賞加總督銜仍留山東巡撫之任都察院左副都御史德奎人甚平庸不稱風憲之任著以四品京堂降補餘俱著照舊供職

○乙卯予明臣黃道周從祀 文廟○戊午宋如林以病免調李

漢爲貴州按察使以容海爲廣東按察使

由南韶連道遷

○是月給江蘇

高郵等四州縣安徽天長縣泗州衛上年水災旱災軍民口糧山陽縣民修屋費貸直隸文安大城二縣河南汝陽淮甯二縣陝甘甯羌等七州縣甘肅狄道等四十州廳縣及肅州州同莊浪等縣丞所屬水災旱災雹災籽種口糧兩淮中正場水災竈戶口糧雲南景東廳被水鹽井修費並免上年額課緩徵江蘇泰州等十州縣安徽天長縣泗州衛山東恩縣德州衛被災新舊額賦河南杞縣山西隰州及平魯五臺二縣逋穀

二月己未朔諭本日松筠到軍機處告知軍機大臣代爲奏請帶



內閣中書徐松隨往熱河審案向來各部院大臣經朕派令出差  
例帶本衙門司員或本衙門無熟悉刑名之人准將刑部司員奏  
明帶往此次濟克默特扎布及色楞旺楚克互控一案係蒙古事  
件前經松筠奏帶理藩院司員尙屬可行松筠係都察院堂官中  
書非其屬下率請隨帶徐松又不於召見時面奏迹近專擅任意  
妄爲不知檢點且此端一開將來出差大臣皆可於所屬意之人  
奏請帶往夤緣奔競尙復成何政體松筠所請不准行著傳旨嚴  
行申飭此係朕曲意成全松筠若不知悛改是無福承受朕恩朕  
惟有執法而行不稍寬宥也○庚申 上御經筵○癸亥諭軍機  
大臣等上年江南高堰漫口清水宜洩過多高寶至清江浦一帶  
河道節節淺阻於本年重運漕船大有妨礙屢經諭令欽差尙書  
文孚等會同兩江總督及河漕諸臣妥商籌辦均以清水來源本

緩一時難期暢注而重運瞬卽前進未便停待懇請引黃入運藉其浮送此固不得已權宜之計雖添築閘壩鉗束盛漲自可無虞泛溢第黃水挾沙而行過後必致淤墊恐目前偶資濟運日久貽患滋深終非善策從前海運之說厯據臣工條議有謂可以試行者亦有謂斷不可行者迄無定見果係河流順軌漕船自可照常由內河行走如必欲捨河運之成規輕冒洪波之巨險一切更張舊制固屬勢所不能然漕糧爲天庾正供所關非細設將來運道竟至淤滯各幫船因而遲誤該督撫等身任地方豈有束手無策不爲設法運京之理自應未雨綢繆另籌妥辦朕思江蘇之蘇松常鎮浙江之杭州嘉湖等府屬濱臨大海商船裝載貨物駛至北洋在山東直隸奉天各口岸卸運售賣一歲中乘風開放每每往來數次似海道尙非必不可行朕意若將各該府屬應納漕米照

常徵兌改雇大號沙船分起裝運嚴飭船水人等小心管駕伊等  
熟悉水性定能履險如夷所有風濤之儆盜賊之事亦可無慮惟  
事係剏始辦理不易然不可畏難坐視漠不相關著魏元煜顏檢  
張師誠黃鳴傑各就所屬地方情形廣諮博採通盤經畫悉心計  
議勿存成見務將如何津貼沙船旗丁不至苦累雇用船隻有無  
騷擾閭閻抑或隨船均須派委員弁照料護押及各該屬由何處  
水次兌運開行抵北時灣泊何所以便起卸運通之處一一熟籌  
據實具奏候朕裁酌施行至江廣幫船應否同江浙漕糧一體轉  
運海口俟江浙等幫海運著有成效再行歸併籌辦亦著一併議  
奏○甲戌以陸言爲左副都御史韓文綺爲四川布政使調劉斯  
喟爲山東按察使裕泰爲安徽按察使以吉恒爲四川按察使由  
北道○以惠端爲左副都御史由  
事運○戊寅 上奉 皇太后啓

鑾謁 陵○免經過地方額賦十分之三○辛巳 上謁 昭西

陵 孝陵 孝東陵 景陵 裕陵至寶華峪閱視 萬年吉地

工程回鑾○癸未 上恭送 皇太后還京師○諭本日據已革

御史捐納員外郎蔣詩呈進畿輔水利志一百卷著發交蔣攸鈞

詳細閱看如有可採擇之處據實具奏○甲申 上幸南苑行圍

○是月給安徽天長縣災民一月口糧展緩江蘇吳縣等四縣舊

欠銀米長蘆嚴鎮海豐二場舊欠銀

三月戊子朔 上還京師○辛卯景謙以病免調誠端爲湖南布

政使以繼昌爲江蘇布政使由直隸馬蘭鎮總兵遷○壬辰調昇寅爲工部

右侍郎以武忠額爲盛京刑部侍郎由內閣學士遷○戊戌諭本年春雨

較少農田盼澤甚殷朕齋心默禱本日渥霈甘霖自丑至午勢尙

未已極爲深透仰荷 昊慈益深欽感耕藉爲勸農重典朕特命

御前大臣禱恩前往藉田看視茲據奏稱藉田扶犁處所積水甚深四推典禮難以舉行朕思耕藉大禮致祭先農必應躬親祀事以答神庥業經先期進宮齋戒本日閱視祝版十二日仍恭詣先農壇致祭並詣太歲壇行禮禮成後還宮其藉田事宜著順天府尹照例率屬行耕藉禮並率農夫終畝以肅明禋而重鉅典○壬寅諭各督撫飭禁獄卒陵虐監犯○甲辰諭黃鴻傑奏臬司出缺請旨簡放前據德清縣生員蔡鴻控徐倪氏謀斃伊姪女徐蔡氏一案兩次檢驗原告未能輸服經該署撫黃鴻傑奏明交該司王惟詢督同覆檢該司忽於覆檢後無故自縊覽奏殊堪駭異之至程含章著補授浙江巡撫祁墳著補授浙江按察使無庸來京卽赴新任此案著交程含章督同臬司祁墳將徐蔡氏屍身細心覆檢是否實係被撻身死抑係自縊務得確情以成信讞

且祁墳由刑部出身刑名素稱熟悉朕所深知斷不許稍存推諉之見有負委任至王維詢到任甫經一月覆檢又未定案卽因新舊件作各執一詞疑慮甚多該司並非原審之員無所顧忌且既稟明該署撫奏請選派刑部諳練司員到浙會檢已據該署撫應允何至鬱悶遽爾輕生若無別情焉有此事程含章等詳細查訪將該司因何自縊緣由據實覆奏務令水落石出不許稍有含混黃鳴傑著俟全案定讞後再行來京候旨○命琦善以總督銜實授山東巡撫○以申啓賢爲倉場侍郎由順天府尹遷○乙巳予國初禦賊陣亡福建總兵官黃藍後裔恩騎尉世職○甲寅調凱音布爲吏部左侍郎以英瑞爲刑部左侍郎由副都統遷○實授百春吏部右侍郎○丙辰諭軍機大臣等孫玉庭等奏趙渡漕船幫數並裏河淤墊見在籌辦情形本年因洪澤湖存水無多不得已引黃濟

運權宜辦理原與嘉慶十六年借黃濟運尙有清水鋪底者情形不同其一切啓放機宜該督等卽應豫籌妥善見在啓放禦黃壩一月之久重運挽渡僅及三分之一而裏河運口一帶已形淤墊漕船閒段阻滯孫玉庭等自當設法籌辦豈能稍有推諉此次所奏將通湖各閘全行啓放使河流暢速下達以免裏河墊淺及應行築壩偪束之處由孫玉庭等相機辦理朕亦不爲遙制總期將全漕重運幫船竭力催提務於夏至前一律趲渡不准藉詞停阻卽將來漕艘回空南下亦須暢行無阻不准一船滯留河北如有貽誤孫玉庭等自問當得何咎懷之慎之○免河南積年民欠並河工加價攤徵銀○是月貨直隸寶坻靜海二縣甘肅洮州等十七州廳縣及莊浪縣丞所屬災民籽種口糧齊齊哈爾被災旗人耕牛銀緩徵湖北石首縣水衝田租兩淮丁谿等六場被水新舊

折價口糧銀

夏四月戊午朔撥直隸河屯協左營額外外委一並各營兵歸茅溝汛把總協防○己未諭軍機大臣等據孫玉庭等奏河口一帶日見淤墊本年節候較早恐黃水漲發未渡軍船爲數正多計算時日已遲盤壩接運需用船隻較多應行趕早雇備除將截留江廣代造直隸剝船並江省原設官剝儘數選用外其餘均須雇用民船查黃河內裝載貨物惟豫省之西河船最大見在黃河上游所在均有除在江省者由魏元煜飭屬就近封雇外請於豫省雇西河船四五百隻山東境沿河曹單二邑亦有此船應儘數雇用等語著程祖洛琦善接奉此旨即將各該省西河船隻趕緊儘數封雇委員押解務於四月內解至江省以資接運毋得遲誤又山東運河內南陽夏鎮以及臺莊等處多有販運豆麥之船每隻可



裝米數百石著琦善將此項船隻一併雇備解往江省應用所有  
前項商船該撫等雇定後應如何酌給運腳口糧之處已諭知孫  
玉庭等會籌妥議卽行知照各該撫可也○甲子諭松筠奏隨帶  
司員請量予鼓勵一摺向來各部院大臣隨帶司員審辦案件事  
竣卽行回京從未有將承審司員率請鼓勵之事或案情重大歷  
時甚久司員等始終勤慎該大臣偶一保奏尙屬可行此次松筠  
經朕派審濟克默特扎布及色楞旺楚克互控一案止係尋常案  
件爲日無多松筠率將隨帶員外郎成格勒音德布二員請交理  
藩院量予鼓勵松筠動則爲沽名邀譽之舉昔日性情永不悛改  
殊屬不曉事體所奏不准行著傳旨嚴行申飭○乙丑免直隸冀  
州積年逋賦○調昇寅爲刑部右侍郎耆英爲工部右侍郎

由兵部調

○丁卯諭軍機大臣等前因運道淺阻藉黃濟運終非善策降旨

令魏元煜等將海運事宜各就所屬地方情形廣諮博採悉心籌議節據該督等覆奏均以爲窒礙難行本日據英和奏通籌漕河全局請暫雇海船以分滯運酌折額漕以資治河各條所奏甚屬明晰國家漕運河防均關重大若止以轉運漕艘爲目前急務而不顧將來河工之貽害則爲患甚巨該督等自當計及萬全俾河漕兩無妨礙本年重運全漕見據該督等竭力催挽並籌備船隻盤壩接運自可以次抵通惟全河大局及本年如何回空明年如何濟運不可不通盤豫籌該督等前此會議各條係爲慎重漕糧節省經費不爲無見然勢值兩難固不可妄議更張亦不可稍事拘泥英和所奏各款意在漕河並治永資利賴該督等接奉此旨務當悉心計議總期不誤轉漕有裨河務勿得稍存成見徒爲目前權宜之計也○實授訥爾經額山東布政使○庚午晉封 全

妃鈕祜祿氏爲 全貴妃祥嬪鈕祜祿氏爲 祥妃珍貴人赫舍

哩氏爲 珍嬪○辛未以伊里布爲陝西巡撫調繼昌爲浙江布

政使以賀長齡爲江蘇布政使慶善爲江蘇按察使由山東運河道遷○

癸酉以容照爲內閣學士兼禮部侍郎銜由奉天○癸未予國初

殉難福建沙縣知縣董潏入祀昭忠祠○甲申諭武隆阿奏備戰

兵丁請仍照舊額挑派等語直隸備戰兵丁向係於各營汛內酌

挑一萬二千名嗣因楊芳具奏添設車礮陣式議請挑派一萬五

千三百三十名見在車礮陣式業經裁撤所有備戰兵丁著仍照

乾隆年間原定一萬二千名之數該提督移會各鎮並嚴飭轄屬

各協營秉公挑選認真訓練毋使營務廢弛○乙酉允創修安徽

省通志○是月貸駐紮款區山西甯武等二營湖北安陸等三營

荊州水師營提標後營兵丁倉穀緩徵山西岢嵐等十三州縣逋

穀河南永城縣蟲災上忙額賦之半

五月甲午諭我朝家法嚴明從不准太監與外人交結至差往各省之事尤屬從來所未有此內外諸臣無不知者前據張師誠等於許墅關盤獲在逃太監馬長書竟敢假冒頂帶捏寫奉旨進香黃旗標插坐船並經軍機大臣會同英和等究出該犯行至丹陽住宿公館令該處家人代雇船隻官爲給價似此招搖恣肆更非潛蹤漏迹者可比尤屬可惡沿途文武各員何竟毫無聞見若非許墅關盤獲竟令長途供頓任意妄爲尙復成何事體見已將該犯按律治罪其失察過境之地方官此次姑免深究著通諭直省各督撫嚴飭所屬凡遇通緝在逃太監務當認真緝拏若有捏稱奉差等事無論已未犯法立即鎖拏奏明懲辦毋稍疏縱儻再失於查拏將來別經發覺定將該犯經過之地方官嚴懲不貸○丙

申諭刑部奏審訊西二供詞據稱該犯屢次在貝勒奕綺府內演唱奕綺令其服役給與護軍校翎頂並有時身穿便服帶同該犯至寶慶堂及各廟閒逛等語奕綺身為貝勒輒招覓此等匪人演唱服役並在外閒遊其平日不知檢束任意遊蕩已可槩見本應按家法懲處姑念其年幼無知無人教習暫從寬貸奕綺著拔去三眼花翎交宗人府嚴加議處嗣後宗室王公等務當各知自愛恪守法度毋得狎比匪人有踰閑檢儻再有似此任情縱恣者一經發覺必當從重懲治決不輕縱懾之慎之尋罰奕綺俸六半年○丁酉諭戶部尙書黃鉞年逾七旬夙夜趨直未免勞動著無庸在軍機處行走俾得專心辦理部務仍直南書房亦無庸逐日進內王鼎著在軍機大臣上行走並著在紫禁城內騎馬○諭慶祥等奏嚴定回疆斂錢條例一摺新疆回部地方往往有代逆裔寄

信斂錢之事甚屬可惡不可不嚴立章程著照所議嗣後如有代  
逆裔寄信斂錢者一經審實將傳遞信物之人卽行正法其出錢  
幫助之人發極邊煙瘴充軍遇赦不赦僅止藉名斂錢希圖肥己  
者將斂錢之人亦發煙瘴充軍遇赦不赦被或出錢之人亦改發  
內地近邊充軍該伯克等務須實力稽查認真辦理凡請票出卡  
貿易回子責令該莊溫巴什具保定限按月呈報至安集延貿易  
出入亦著呼岱達會同伯克隨時嚴查毋得日久生懈○己亥以  
海口停淤命魏元煜嚴飭履勘雲梯關外長隄○甲辰諭秋諫爲  
明刑鉅典預議諸臣原應公同集議以昭詳慎刑部辦理秋審各  
案向止摘敘略節刊刻招冊分送九卿詹事科道屆期會議其改  
實改矜改緩之案並不將擬定看語豫行知照僅於會議時令書  
吏宣唱諸臣焉能備悉案由從而商榷是徒有會議之名而無實

議之實豈國家矜慎庶獄之意乎嗣後著刑部將議定改擬各案看語彙齊繕刻於會議前五日分送九卿詹事科道俾豫行查對招冊案情是否允協會議時得各據所見以重刑獄而昭覈實○調張師誠爲安徽巡撫陶澍爲江蘇巡撫○乙巳諭軍機大臣等本日孫玉庭等奏黃水消落禦黃壩內外停淤在後幫船均淺滯不能拉挽已於五月十二日將禦黃壩堵閉斷流並將濟運壩啓放導引湖水入運幫船接次上挽起卸漕米隨時盤壩接運等語禦黃壩見已堵合漕幫未能依限趙渡嗣後著無庸按幫具奏其盤壩接運各事宜孫玉庭等自己先事籌備著卽查照奏明章程妥爲辦理所有剝運船隻見在是否備齊共需用若干何日由江省開行及何時一律完竣之處孫玉庭等隨時具奏可也○命琦善赴南河高家堰查視石工並勘河淤情形○丁未諭程含章奏

查明糧艘水手滋事情形據實奏參一摺前據御史錢儀吉奏嘉  
白杭三兩幫水手恃眾行兇傷斃多命該府縣營汛畏葸觀望情  
形與黃鳴傑歷次所奏種種不符當降旨交程含章逐一詳查茲  
據該撫查明該省糧船舵水向有老安潘安等教名目本年因爭  
駕新船起釁自二月初四日械鬪至初七日乃息該署撫黃鳴傑  
形同木偶坐失機宜大小文武各官辦理鬆懈以致該水手等肆  
行無忌殊出情理之外除秀水縣徐起渭嘉白幫領運千總黃逢  
輝業經革職外杭州府通判袁霽嘉興協都司吉元志杭三幫領  
運千總朱鳳鳴先事失於防範臨時不能彈壓事後不能緝兇實  
屬畏葸無能袁霽吉元志朱鳳鳴俱著革職俟定案時再行覈辦  
嘉興府知府羅尹孚嘉興協副將慶康不能督率營縣嚴行約束  
坐觀無策致成巨案羅尹孚慶康俱著交部嚴加議處糧道李宗



傳平日漫無約束復不直往嘉興彈壓轉回省城向巡撫請示殊屬不合杭嘉湖道陳鍾麟不卽馳往督辦遲至十餘日始行前往亦屬不知事體輕重李宗傳陳鍾麟俱著交部議處署巡撫黃鳴傑並不親往督辦已屬軟弱無能又復有心諱飾含混入奏實屬孤恩溺職黃鳴傑著交部嚴加議處尋議上得旨黃鳴傑著卽革職羅尹孚慶康俱著革職李宗傳陳鍾麟俱著降三級調用○戊申召孫玉庭來京○召顧檢來京調魏元煜爲漕運總督以琦善爲兩江總督調伊里布爲山東巡撫以鄂山爲陝西巡撫鄧廷楨爲陝西布政使姚祖同爲陝西按察使由太常寺少卿遷○辛亥定滿洲蒙古考職例由恩拔副貢生考取一等者以州同用二等三等以州判縣丞用由歲優貢生及考中監生捐納貢監生考取一等者以主簿用二等以吏目用均在旗候選無庸赴部投供○壬子以

貴慶爲內閣學士兼禮部侍郎銜

由通政司參議遷

○癸丑諭軍機大臣

等逆裔張格爾自上年九月經官兵勦捕竄投喀拉提錦又來至伊爾古楚卡倫外仍圖窺犯因防捕嚴緊仍復違戾差人投降數次經永芹等疊派伯克護衛出卡申約曉諭該逆始終猶豫誘約奈曼部落布嚕特比等不從退移二十里外竄去無蹤狼子野心情殊狡詐其擅縛布嚕特比伊滿及呈霍罕伯克原信並懇求釋放伊斯拉木出卡見面種種叵測之處尤堪髮指該逆如敢再來該大臣當相機盡心殲擒不可輕信其言致墮奸計見已竄逸無蹤亦不必徒勞兵力尾追卽再來逞詐投降正可置之不理永芹等見派協領等帶兵在木吉地方防其復來所有各卡倫著卽嚴密巡緝加意防範毋稍疏虞其喀什噶爾回眾及卡外布嚕特該大臣等當加意安撫俾人人樂爲我用得以偵探該逆蹤迹相機

辦理至張格爾之弟巴布頂見在竄往何處是否隨同張格爾句  
結野夷滋事並著永芹等查明具奏此次差委出力之布嚕特比  
等雖未將該逆擒獲著有勞績惟始終效順勤奮可嘉所有奈曼  
部落四品頂帶花翎布嚕特比伊滿自張格爾滋事以來誠心出  
力差探多次被縛不屈至張逆到木吉句結經伊滿密告伯克等  
防備得洩奸謀始終勤奮著加恩賞給三品頂帶段二匹五品頂  
花翎布嚕特比阿布都拉依本不受逆回句結被格得勒沙傷其  
頭顯著加恩賞給四品頂帶段一匹六品頂帶布嚕特比曼勃特  
率屬撫護伯克等不至被害著加恩賞五品頂花翎段一匹吐勒  
額依格爾部落六品頂布嚕特比巴哈提拜差探認真著加恩賞  
給五品頂帶奈曼部落閒散布嚕特多列特住瑪喀隨伊滿出探  
賊情均屬出力多列特著加恩賞六品頂藍翎住瑪喀著加恩賞

金頂監餉閒散布魯特提拉巴爾底等八人差探得力不辭勞苦  
俱著加恩賞給金頂並共賞盤費銀三百兩以示鼓勵○甲寅諭  
上年高堰漫口清水洩枯以致本年重運未能暢行是以勉從諸  
臣所請爲借黃濟運之舉屢經飭諭在事臣工詳慎妥辦並以漕  
糧爲天庾正供如軍船稍有阻滯惟孫玉庭等是問旋據孫玉庭  
等奏稱自二月初九日啓放禦黃壩運河水勢一律深暢見距夏  
至尙早計可不誤期限備五月初旬黃水已長不過三進在後數  
幫再籌接運亦可不誤惟當盡心籌畫全達通倉不敢因循自取  
重咎等語乃經歷三月之久僅過船二千八百十八隻此外未渡  
黃者尙有四十幫轉以盤壩剝運請帑至一百二十萬兩之多本  
日據孫玉庭等奏禦黃壩業經堵閉見將在後各幫漕糧盤剝並  
不能挽抵原議之高坂頭等處就近盤壩是孫玉庭等全無把握

所入奏者無非塞責空談尙得爲之實心實力爲國宣勞之大臣  
乎朕用人行政一秉大公於諸臣功過從不豫存成見亦不使令  
掣肘傾心委任孫玉庭等既不熟籌於前又復遲誤於後此而曲  
加寬貸何以昭懲勸而服厥心孫玉庭前在兩江總督任內不早  
參張文浩以致坐失機宜本應照部議革職經朕曲加保全改爲  
革職留任並因伊熟悉該省情形飭令在彼認真經理宜如何激  
發天良以冀稍贖前愆乃朕屢次嚴旨飭諭孫玉庭並不早爲通  
盤籌計及至事當設法趕辦之時又復束手無策虛糜帑項病國  
病民實屬孤恩溺職孫玉庭著交部嚴加議處魏元煜本係漕督  
經朕簡授兩江總督漕運河工皆其所轄顏檢經朕特簡漕督並  
諭令妥速辦理嚴煩身爲河督河務是其專責皆未能籌辦妥協  
有誤漕行均難辭咎魏元煜顏檢嚴煩俱著交部議處○乙卯改

湖南永順府古丈坪督捕同知爲撫民同知移桑植縣下崗巡檢  
爲古丈坪巡檢○是月賑貴州鎮遠府屬州縣水災並免額賦貸  
兵丁餉銀給城衙修費貸湖北荊州城守等四營駐紮災區兵丁  
倉穀緩徵山東濟甯等七州縣雹災直隸寶坻等九州縣水災旱  
災新舊額賦並貸倉穀

六月戊午諭吏部將大學士孫玉庭等分別議以革職降級調用  
朕惟國家用人之道貴在賞罰嚴明而賞罰之平尤在權衡功過  
朕自臨御以來於內外諸臣無不傾心委任從不以其人之功過  
豫存成見意爲寬嚴孫玉庭經朕特旨留駐清江督辦漕運並不  
通盤籌畫勉贖前愆乃一味虛詞塞責臨事周章糜帑病民孤恩  
溺職本應照部議褫革念其曾任督撫宣力有年著加恩賞給編  
修休致顏檢經朕特簡漕督漕務是其專責乃不能妥速辦理有

負委任且年力就衰著加恩改爲降二級以三品銜休致魏元煜  
嚴烺經朕屢次飭諭均未能籌辦妥協卽照部議降調亦屬咎所  
應得姑念魏元煜甫經簡授兩江總督到任未久嚴烺職司河務  
此次漕運遲延非盡關河工辦理未妥尙可稍從末減魏元煜著  
加恩改爲降四級從寬留任嚴烺著加恩改爲降三級從寬留任  
以示朕甄覈功過務昭平允至意○命蔣攸銑爲體仁閣大學士  
仍留直隸總督任以禮部尙書汪廷珍協辦大學士○壬戌諭戶  
部議覆魏元煜等奏請添撥南河大汛工需銀五十萬兩及啓放  
王營減壩籌備銀三十三萬兩南河自上年高堰漫口工用浩繁  
該督等見因籌辦要工援例請撥著照戶部所議准其撥給河南  
候撥高堰工需銀三十萬兩安徽藩庫存戶部項下銀三十萬兩  
兩浙春撥鹽課銀十五萬兩蘇州春撥清項銀八萬兩卽令各該

撫鹽政等派委委員解交河庫以備支放南河大汛防險自嘉慶二十四年後並未續請添撥王營減壩自嘉慶二十一年後亦未另案請撥茲以數年裁省之款忽又援案陳請國家經費有常豈容漫無節制該督等所稱隨時撙節亦恐徒託空言總當加意慎重力汰浮糜不得因此次姑允所請遂援以爲常例也至歷來河工事竣僅由工部覈銷殊不足以昭詳密嗣後歲修及另案工程工竣報銷時著將請撥銀兩有無餘賸及餘賸若干留備何項工程之用一併專案咨報戶部以備查覈卽自本年爲始遵照辦理以重帑項而杜浮冒○諭軍機大臣等御史汪世祚奏請防糧船水手設教斂錢流弊一摺據稱各幫糧船舵水設有三教一曰潘安一曰老安一曰新安所祀之神名曰羅祖每教內各有主教名曰老官每幫有老官船一隻供設羅祖入其教者投拜老官爲師



各船水手聯名資助統計三教不下四五萬人沿途釋手尙不在  
此數水手雇值向例不過一兩二錢近年挾制旗丁每名索二三  
十千不等及銜尾前進忽然停泊老官傳出一紙名曰溜子索添  
價值旗丁不敢不從水手滋事必送老官處治輕則責罰重則立  
斃沈入河中沿途招雇釋手必推曾經械關受傷者爲頭目遇有  
爭鬪以紅箸爲號人卽立聚新安一教尤多匪徒此次欲在江南  
聚興集地方招人報復因船未渡黃而止此案水手滋事宜設法  
嚴辦以後遇有滋事皆當加等重懲明年儻暫行海運此數萬人  
安保不滋生事端尤宜妥爲安插等語糧船水手膽敢設立教名  
斂錢聚眾不法已極本年水手因爭船起釁械鬪至四日之久總  
由該撫等庸懦無能以致肆行無忌若不嚴行懲辦將來藐法之  
徒何所底止除此案在逃逸犯著程含章嚴拏務獲重辦外並著

漕運總督及有漕各省督撫細心察訪應如何示以懲創分其黨與俾運官旗丁不受挾制及地方官不至規避處分有心消弭並兩岸奸民不至互相鉤結悉心籌議弭患未然固不可釀成巨案尤不可激生事端此爲至要○諭魏元煜奏籌議漕河全局一摺前據英和奏通籌漕河全局請暫雇海船以分滯運酌折額漕以資治河富降旨交該督等悉心計議茲據魏元煜奏稱江浙漕額殷繁一經折色恐小民觀望拖延辦理轉形掣肘所有江浙漕米請仍循舊章槩徵本色儘數運通見在堰圩隄工已砌十餘層清水已蓄八尺八寸計至來春總可在一丈以外如力能敵黃趁清水直達河口開壩趲挽一月內可期全數渡竣至海運章程事關初始如蒙宸斷施行再督飭司道詳晰妥議等語試行海運原因運道淺阻爲一時權宜之計朕周諮博訪志在擇善而從是以諭

令諸臣悉心妥議計出萬全不爲遙制魏元煜乃欲出自宸斷意存推諉殊非實心任事之道至折色一節業據魏元煜奏稱辦理恐形掣肘惟各省情形不同見在勢值兩難力求漕河並治英和旣爲此奏並著琦善魏元煜陶澍程含章遵照前旨悉心議奏務須盡善無弊期於公事有裨見在清水已有八尺八寸本年糧船是否可以全數回空不至停留河北明年重運北來是否仍可照常濟運即使不能敵黃而糧船連檣前進能否直達河口開壩趲挽能否全數渡黃著琦善魏元煜察看清水情形詳悉奏聞至海運試辦是否可行朕並不豫存成見該督等會商妥議一併據實具奏○乙丑命加濬雲梯關外引河並接築兩岸新隄○丙寅諭孫玉庭顏檢奏查看幫船盤運情形恐致遲誤請援照成案截留存貯籌辦一摺本年運道淺阻不得已借黃濟運權宜辦理因孫

玉庭熟悉江南情形特令留該處與顏檢會辦重運事宜勉贖前愆屢經飭諭詳籌妥辦據孫玉庭等覆奏啓放禦黃壩後運河水勢深暢計期可以不誤卽須剝運亦不過在後數幫迨至節近夏至始據奏稱渡黃艱澀尙有軍船四十幫須盤壩接運請帑至一百二十萬之多猶復勉從所請不令掣肘乃具奏未幾卽有盤剝不能如原議悉抵高坂頭之說巧爲嘗試本日又據奏稱非不竭盡人力趨辦無如水勢短絀難以挽行愈剝愈遽運價更增非但經費不敷並恐稽遲時日若照成案截留期節經費而免滋擾是孫玉庭此時方知剝運之難計及經費時日於事何濟不但形同虛曠試問良心安在且已糜帑無算累民日久尙可謂之節經費免滋擾侈言不惡實出情理之外前經兩次部議革職朕曲加恩宥尙賞給編修休致乃前後籌辦情形層層貽誤坐失事機實屬

溺職孫玉庭著卽革職以示懲儆顏檢曾任督撫有年自特簡漕督以來並不盡心通盤籌畫一味游移遷就實屬無能著降爲五品銜休致○諭軍機大臣等據孫玉庭等奏稱見在盤運水勢短絀重船難以挽行半月來僅盤運米八九萬石此尙係停泊淮安以北之幫若淮安以南運價更增非但經費不敷並恐稽遲時日請查照成案暫截淮揚所屬州縣存貯或下年搭運北上或借給同空幫船食米及量爲平糶三款辦理等語前因運道淺阻不得已借黃濟運屢經飭諭孫玉庭等將能否令全漕重運渡黃北上悉心籌辦據孫玉庭等覆奏自啓放禦黃壩後運河水勢一律探暢見距夏至尙早計可不誤限期如黃水已長不過將在後三進數幫再籌接運及至奏請盤壩則有未渡之船四十幫即使盤壩之米悉數抵通已屬糜帑病民乃復據奏僅能剝運米一百萬石

北上尙餘米一百萬石又請照案截留孫玉庭顏檢並不通盤籌  
畫行一步算一步至此時方計及經費時日天良何在可謂喪心  
之至魏元煜前此會同籌議一味扶同遷就已不能辭咎琦善係  
新任總督無所庸其回護著將見在未渡軍船究能盡力全數盤  
運與否抑或別有籌辦之法卽行悉心從長妥議由驛速奏若再  
不能詳議盡善妥速辦理魏元煜自問當得何咎琦善亦責無旁  
貸懷之慎之○丁卯申禁湖南洞庭湖濱圍築私垵並復派員巡  
湖○戊辰撥甘肅西甯鎮外委一駐康家寨堡添設日蘭木塘汛  
撥巴燕戎格外委一更替稽查○以常文爲盛京戶部侍郎由左  
遷○己巳諭軍機大臣等本日戶部奏請將孫玉庭等前請撥  
銀兩扣出銀四十二萬兩並將此次滯漕剝價各項銀款令孫玉  
庭等分成賠繳一摺據稱孫玉庭顏檢請帑不已借黃而黃轉病

濟運而運更阻其籌辦盤運奏准需銀一百二十萬兩先撥運一百二萬兩此次僅能剝運漕米一百萬石計需銀六十萬兩所有多撥銀四十二萬兩應將安徽所撥三十萬兩無庸起解卽交江蘇藩庫另款存貯再於廣東應解部銀三十萬兩內扣出十二萬兩解江蘇藩庫另款存貯其盤運米一百萬石將來到通卽照原奏駁銷不得稍逾此數如運不足數總按實運到通米數覈給每日運米無多所雇民船盡歸閒曠按日發給食米無非浮費所有此次滯漕剝價較前奏增出之費及將來折耗米石並雇船閒曠日期給領食米等項銀米均不准開銷請飭新任總督俟將來事竣時將各項銀米責令孫玉庭賠繳七成顏檢賠繳三成以爲誤國病民者戒等語前據孫玉庭等奏察看幫船盤運情形僅能剝運米一百萬石尙餘米一百萬石請照成案截留當降旨交琦善

等將見在未渡軍船能否全數盤運抑或別有籌辦之法妥議由  
驛速奏茲據戶部奏孫玉庭等籌辦盤運案內先請撥銀一百二  
萬兩今既稱僅能剝運漕米一百萬石計需銀六十萬兩卽應扣  
出四十二萬兩免撥並令將滯漕剝價各項銀款責令照數分別  
賠繳該部所奏自係慎重度支朕並不豫存成見見在已經載米  
渡黃船隻若干前此奏准撥銀一百二萬兩解到若干已用若干  
見存若干應扣出若干如按照從前奏定章程盤運米石俱歸實  
用自應准其開銷此外如續經添出款項虛糜國帑不應准銷各  
款應如何責令孫玉庭等分成賠繳之處著琦善魏元煜查明據  
實具奏再降諭旨至江廣各幫應如何籌辦運法著該督等妥議  
具奏見當伏秋大汛作何防禦海口應如何刷暢河身如何疏通  
已渡黃之船能否回空已卸載之船曾否飭令歸次並著該督等



通籌妥酌奏明辦理○癸酉諭琦善奏請嚴定工員疏防處分等語定例河工廳員職司修守處分獨嚴近年以來河底淤高險工疊出偶有失事請帑動以數百萬計與從前情形大相懸絕卽照例參處尙覺情重法輕乃僅以摘去頂帶工完開復揆之情法未爲平允更恐不肖廳汛各員捏工報險河督慮爲挾制不得不發給錢糧殊於吏治河防大有關係著該部將河工疏防文武各員應如何從重處分治罪之處議定奏明頒示如再有疏防卽著照新例懲辦不稍寬貸尋吏部議查見行則例衝決與漫決雖分二條其處分不甚懸殊請改爲隄岸衝決如已過保固年限管河防守各官俱革職道員降二級調用總河降一級留任保固限內半年以外衝決者經修防守之同知通判州縣等官革職道員降三級調用總河降二級留任如一經奪溜卽照例議處不得藉稱漫

口僅以摘去頂帶工完開復題參豫爲屬員開脫地步兵部議已  
週保固年限隄岸衝決管河守備千總把總外委革職遊擊參將  
降二級調用保固限內半年以外衝決者修防守備千總把總外  
委革職遊擊參將降三級調用從之○爾琦善奏察看黃運兩河  
淤墊幫船淺滯盤運艱難情形各摺本年借黃濟運原係權宜辦  
理在事諸臣卽應通盤籌計相機妥辦孫玉庭前已獲咎念其熟  
悉江南情形特令留辦重運事宜勉贖前愆若當開放禦黃壩後  
察看漕艘挽渡艱難卽應據實陳奏趁早變計及降旨詢問猶以  
計算夏至前不誤重運挽渡期限其回空軍船喫水旣輕順流南  
下亦不至誤歸次乃具奏未幾卽有盤壩接運之請迨盤壩二十  
餘日僅剝米十萬石則又奏請截留計所奏自開放禦黃壩及堵  
壩之期已三月有餘渡船僅二千八百餘隻茲據琦善奏稱孫玉

庭等前此所奏渡黃船隻有渡黃後等候一月尙未開行並有淤  
在禦黃頭壩以內二壩以外及裏河運口內三壩四壩之間者共  
船五十餘隻其應行刺運軍船皆膠柱不能那移有水之處盡被  
民船擁塞河面窄小舳舻轉運不便且占住河身不能挑挖回空  
船隻亦無處容納孫玉庭身受 三朝厚恩辦事至於如此自問  
當得何罪魏元煜身任兩江總督不特有兼理漕務之責且漕督  
是其舊任乃與顏檢坐觀事機之敝壞隱忍不言糜帑病民是誠  
何心魏元煜著降爲三品頂帶暫留漕督之任以觀後效孫玉庭  
顏檢俱著不准回籍交琦善督令將運河淤墊之處一律挑挖深  
通所需挑費著落孫玉庭魏元煜顏檢分賠如果回空軍船毫無  
阻滯屆期奏明或可稍從末減備再稍有貽誤著琦善魏元煜嚴  
參具奏一面將孫玉庭顏檢傳旨拏問由驛奏明候旨○諭軍機

大臣等據琦善奏接印任事察看黃運兩河淤墊幫船淺滯盤運艱難情形及籌辦河朔剝運事宜各摺覽奏俱悉所有查勘湖河工程及東省船隻儘數裝運諸事已諭知嚴烺訥爾經額照辦矣清河做壞一至於此見已另降諭旨飭令孫玉庭等留工將運河淤墊之處著落賠挑琦善卽督飭孫玉庭等照估興挑一律寬深如式俾資湖水暢出捉挽浮送其豫東接運之四十萬石務令設法如期盤竣不誤豫東新船受兌新漕爲要見在河面有水之處既被民船壅塞剝船難以轉運卽派員設法催那騰空河面俾軍船提前一里卽省一里之糜費其渡黃閒斷淤阻之紹興後幫船隻亦須及早設法催挽北上方可起卸回空至高堰石工見在辦理情形尙覺稍寬朕懷如有應行籌辦者亦當與嚴烺從長計議務保萬全朕用卿爲兩江總督知必能分朕憂卿其勉副腹心股

肱之任盡力爲之無恤其他無論見任離任大小各員如有斷難姑容者卽指名嚴參毋稍顧忌以挽頽風勉之勿怠又諭琦善奏河務緊要請敕河臣周厯查勘一摺據稱嚴烜自調任南河後卽值籌辦借黃濟運各事因南糧未經渡竣不敢擅離不特近今溜勢之變遷工程之生閉該河督未曾目覩卽各廳工料是否充足高堰修築各工能否足資抵禦亦不克分身往勘刻已伏汎屆臨請旨飭令該河督將湖河各工親厯履勘等語所奏是南河經管二十三廳工鉅費繁一切修守宣防在在均關緊要該河督必須隨地親厯洞悉機宜辦理方有把握琦善見駐清江督辦漕運未能前往周勘各工嚴烜統轄全河責無旁貸著於接奉諭旨後卽親赴湖河各工周厯履勘見在堰圩補修石工作成幾層是否鞏固足資抵禦各廳應辦工料是否充足足備修防卽洪湖存水雖

見日長是否漸可導引敵黃以期回空之時啓壩無誤至河底閒  
段淤墊應若何設法刷通該河督務當逐一認真查勘相機妥辦  
籌計萬全斷不可顧此失彼並嚴飭各該道廳員弁隨時小心防  
守永保安瀾毋得稍有疏虞是爲至要該河督著俟各工勘畢再  
行折回籌議漕運與漕督妥商速辦可也又諭據琦善奏接運漕  
米船隻統江南豫東三省封雇本省官剝與江廣解直剝船不過  
運米五十餘萬石必須將豫東接運漕糧四十萬石先行運送待  
前船押回始可將浙江漕糧運竣是已雇船隻但可多載一石卽  
多得一石之益乃前此所剝運交豫東軍船之紹興前幫米七萬  
餘石每船止按七分裝載西河船戶藉詞過關上水難行若非船  
戶圖帶私貨卽屬旗丁豫帶土宜此時船已開行無從查驗惟恐  
東省軍民船隻聞風效尤或江省前經起運之紹興前幫旗丁船

戶恃強爭執則運通漕糧更形短少等語剝運船隻總須按船口裝足以期多運漕糧若每船止裝七分任令船戶等私帶貨物則四十萬石漕糧斷難全行接運著訥爾經額接奉諭旨後即派委委員前赴濟甯一帶查明東省接運船隻督令按船儘數滿裝如查有帶往貨物即隨地掀卸不准再爲轉運儻旗丁船戶有爭執情事即行嚴拏究辦毋稍輕縱○伊里布丁憂以訥爾經額護山東巡撫劉斯崐署山東布政使王檢署山東按察使由鹽運使署○甲戌魏元煜卒以穆彰阿署漕運總督普恭署理藩院尙書前在江軍○戊寅諭軍機大臣等前據英和奏通籌漕河全局請暫雇海船以分滯運酌折額漕以資治河當交各該督撫悉心議奏茲據程含章查照英和原奏詳晰籌議所奏俱悉浙江乍浦海口內河外海中隔石塘塘外積有鐵板沙塗海船不能停泊其甯波府甬江

口可以收泊海船惟由有漕州縣剝運至甯波中隔兩江三壩必須盤剝五次耗費甚鉅浙江明年之米該撫請仍由運河運送入京自係實在情形其酌折額漕一節亦據該撫奏窒礙不可行所有浙江明年全省漕米仍著徵收本色該省海運折色二條均無庸議○己卯諭陶澍奏勸設義倉章程一摺國家養民之道足食爲先而裕民之原積貯尤重前年安徽偶遇荒歉賑撫兼施該撫請設立義倉爲未雨綢繆之計所議章程如州縣中每鄉村公設一倉秋後聽民捐輸歲歉酌量散給出納悉由民間經手不假官吏防侵蝕以禁騷擾矜貧寡而杜爭端各條著卽移交新任巡撫照議妥爲經理仍督飭各州縣實力勸導有成總期經久無弊不必另立倉名○壬午添設山西河東鹽池巡查弁兵如淮鹽輯私例○甲申諭琦善奏江廣未渡軍船請提用江南首進回空



船隻接運一摺前因運道受淤糧艘阻淺經孫玉庭等奏請截留米一百萬石存貯淮揚並借給軍船量爲平糶朕以辦理種種貽誤降旨令琦善悉心妥議另籌良法茲據查明本年江南無須平糶借給軍丁亦無實濟淮揚見無空倉可貯搭運必多虧爛孫玉庭等所議囤貯出借平糶三條均屬窒礙難行者無庸議該督於萬難措置之中力籌盤運之法請將本年首進軍船自淮安頭幫至江淮九幫並例不過淮之淮安三江北長淮四等幫共船一千一百八十六隻接運江廣漕米一百二萬九千餘石按船勻裝徑抵通倉見在雨水較多閘河行走自可迅速將來幫船回空亦不至中途停滯所有接運漕糧之幫丁按石照民船給值俾免苦累將來首進軍船卽令在北岸臨黃運河停泊由江省多備民剝渡黃運交其江廣重運船隻卽令將貨物起卸俾得就近墊剝所辦

俱好著訥爾經額卽飭令豫東接運民船暫行停讓並著僉派安  
幹員弁嚴催首進回空幫船飛挽南下以備接運毋得稍有遲誤  
所有業經渡黃之二進幫船將來回空歸次及此次接運首進幫  
船回空守凍分派員弁稽查並酌量回空事宜俱著照所奏妥辦  
○諭軍機大臣等琦善奏遵旨籌議海運折漕大槩情形一摺據  
稱與陶澍面商飭藩司賀長齡親赴海口督同地方官將商船設  
法招徠並制運兌裝等事逐一籌議章程再行會奏至折漕一事  
江省漕額較重欲令以米易銀完納足數民力未必裕如更恐不  
肖官吏增價病民甚至任意侵那將完作欠擬將來歲新漕先儘  
海運數目確切議定再將未能起運米石設法變價解歸工用儘  
變價難期迅速再行酌量存貯俟督飭江甯江蘇兩藩司定議具  
奏至籌辦海運皆在上海一處出口沙船爲數無多儘各省漕糧

俱從上海放洋船隻愈形短少必致連江省議運之米壅滯難行  
浙省本有甯波乍浦兩海口自可就近辦理其安徽江西湖南湖  
北四省均無海道請敕浙江等省督撫豫籌本年回空勢不能不  
借黃浮送來歲新運正當湖水消耗如竟開壩趙挽實未敢冒險  
嘗試等語覽奏均恐所有來年海運事宜著俟藩司賀長齡赴海  
口籌議該督再會同該撫妥議具奏折色既不可行其變價存貯  
二議亦俟該藩司酌覈情形詳晰定議務期官民兩無窒礙至所  
稱來年海運皆在上海船隻無多浙省尙可分運惟前據程含章  
奏浙省乍浦海口中隔石塘不能停泊甯波甬江口遠隔三江五  
壩盤剝費鉅折漕一節亦窒礙難行已降旨令該撫無庸辦理所  
有安徽江西湖南湖北四省均無海道著李鴻賓等各就本地情  
形豫爲籌計如明年清水足資敵黃仍可照舊辦理儻情形尙有

阻滯或量收折色或變價歸工或設法存貯待至下年搭運議定  
後卽一面奏聞仍咨會琦善陶澍妥商辦理事關重大斷不可遷  
就游移尤不可冒昧輕率總期於事有濟計出萬全勿存成見是  
爲至要至琦善奏本年回空仍須借黃來歲新運正當湖水消耗  
未敢冒昧嘗試自係爲慎重起見著與嚴烜會同妥議務令蓄清  
敵黃漸復舊規照常濟運方爲妥善又諭琦善奏豫籌漕運章程  
等語據稱洪澤湖石工見在已屆七分以上出水六尺有餘約計  
八月中旬可以完竣惟明歲海運尙不敷全漕之半自應及早籌  
畫收蓄清水期於漕糧全數抵通嚴烜身任河督河務是其專責  
著卽詳細履勘就見在情形是否可將清水收足以資敵黃濟運  
抑或另行設法籌辦務期來年漕糧全數盡抵通倉不至臨時急  
遽並著琦善會同悉心妥議具奏又諭琦善奏盤壩制運米數及

內河剝船拔壩趕運情形一摺本年未經渡黃漕米前經奏准以豫東軍民船隻接運四十萬石於七月十五日以前到彼交裝以期無誤該省新漕茲據琦善奏稱晝夜趲盤截至六月二十日止前後共運過米三十一萬五千餘石先將外河剝船全數裝運於二十一日一律開行渡黃直運濟甯交送軍船趕赴七月十五日之限並飭委員於交卸後趕卽將運往剝船押回至閉阻禦黃壩內之江廣剝船及江省所雇民船見設法拔出外河一面盤運一經裝足八萬餘石之數卽可接續開行以便豫東民船接運等語見在盤運米數日見旺盛辦理甚爲迅速其沿途經過地方亦應一律催趲銜尾前進俾令及早交裝接運無誤奏定限期著訥爾經額嚴飭沿河文武員弁竭力趲催毋任稍有延滯○乙酉諭軍機大臣等陶澍奏籌議海運及暫收折色停運沿河各情形據稱

折色與停運二者均不可行來年當以海河並運爲宜廣招商船分作兩次裝載計可運米百五六十萬石其餘仍由河運而行秋冬之間卽由河督派員將運河挑挖深通計來春湖水益增自可引導濟運等語太倉儲蓄本宜陳陳相因停運之說原未可輕爲議及至漕糧改徵折色卽與地丁無異以江省額徵漕糧數計應折之銀爲數甚鉅民間以米易銀遽難出糶必致穀賤傷農是折漕一節江省尤難施行此事竟無庸置議海運一事旣據該撫奏稱目前籌運之策無踰於此與琦善意見相同著俟藩司賀長齡赴海口查勘情形籌畫到日卽將一切章程會同妥議具奏惟明年海運漕米不過一百五六十萬石其餘漕糧亦應及早籌蓄清水仍由河運方爲盡善昨琦善所議將海運餘贖米石酌量變價存貯亦非萬全之策著與陶澍從長定議相機妥辦勿存成見總

期於國計民生實有裨益用副委任其另片奏倣照唐代轉運之法於沿淮沿河一帶建置倉廩一節見在既籌河海並運此事暫緩籌辦該督等總當先其所急也○是月貸福建提標五營泉州城守營穀價